

四庫全書

史部

欽定四庫全書

蜀中廣記卷七十六

明 曹學佺 撰

神仙記第六

川北道

神仙傳曰張道陵者沛國人也本太學書生博通五經
晚乃歎曰此無益於年命遂學長生之道得黃帝九鼎
丹法欲合之用藥須糜費錢帛陵家素貧欲治生營田

牧畜非已所長乃不就聞蜀中人多純厚易於教化且多名山乃與弟子入蜀住鶴鳴山著作道書二十四篇乃精思鍊要忽有天人下來乘萬騎金車羽蓋驂龍駕虎不可勝數或自稱柱下史或稱東海小童乃授陵以新出正一盟威之道陵受之能治病於是百姓翕然奉事以為師弟子戶至數萬即立祭酒分領其戶有如官長使諸弟子隨事輪出綵絹器物紙筆樵薪什物等令人修復道路不修復者皆能疾病百姓斬草除溷無所

不為皆出其意而愚者不知將為此文從天上下也陵
又欲以廉惠治人不喜使刑罰乃立條制使有病疾者
皆䟽記生身已來所犯之罪乃首言投水中與神明共
盟約不得復犯法將當以生死為約於是百姓計念避
迨病疾輒當首過一則得愈二使羞慙不敢重犯且畏
天地從此之後所違犯者皆改為善矣陵乃多得財物
以市其藥合丹丹成服半劑不願即昇天去乃能分形
作數十人其所居門前水池陵常乘舟戲其中而詣道

士賓客往來盈庭巷座上常有陵與賓客對談共食飲而真陵故在池中也其治病事皆採取玄素但改易其大較轉其首尾而大途猶同歸陵語諸人曰爾輩多俗態未除不能棄世正可得吾行氣導引房中之事或可得服食草木數百歲方耳其有九鼎大要唯付王長又言合有一人從東方來當得之此人必以正月七日日中到具說長短形狀至時果有趙昇從東方來生年未相見其形貌一如陵所說陵乃七度試昇皆過乃授昇

丹經七試者第一試昇到門不為通使人罵辱四十餘日露宿不去乃內之第二試使昇於草中守黍驅獸暮遣美女非常託言遠行過寄宿與昇接牀明日又稱脚痛不去遂留數日亦復調戲昇昇終不失正第三試昇行道忽見遺金三十餅昇乃走過不取第四令昇入山採薪三虎交前咬昇衣服唯不傷身昇不恐顏色不變謂虎曰我道士耳少年不為非故遠千里來事神師求長生之道汝何以爾也豈非山鬼使汝來試我乎須臾

虎乃起去第五試昇於市買十餘匹絹付直訖而絹主
誣之云未得昇即捨去別脫已衣買絹而歸殊無恡色
第六試昇守視田穀有一人來叩頭乞食衣裳破弊面
目塵垢身體瘡膿臭穢可憎昇愴然為之動容解衣衣
之以私糧設食又以私米遺之第七試陵將諸弟子登
雲臺絕巖之上下有一桃樹如人臂傍生石壁下臨不
測之淵桃有大實陵謂諸弟子曰有人能得此桃實當
告以道要於時伏而窺之者二百餘人股戰流汗無敢

久臨視之者莫不却退而還謝不能得昇一視乃曰神之所護何險之有聖師在此終不使吾死於石中耳師省教者必是此桃有可得之理乃從上自擲正得投樹上足不蹉跌取桃實滿懷而石壁險峻無所攀緣不能得還乃以桃一一擲上正得二百二顆陵得而分賜諸弟子各一自食一留一以待昇陵乃以手引昇衆視之見陵臂加長二三丈昇忽然已來還乃以向所留桃與之昇食桃畢陵乃臨谷上戲笑而言曰趙昇自正心身

投樹上足不蹉跌吾今欲自試投下當應大得桃也衆人皆諫唯昇與王長嘿然陵遂投空不落桃上失陵所在四方皆仰上則連天下則無底往來道路莫不驚歎悲涕唯昇長二人良久乃相謂曰師則父也自投於不測之崖吾何以自安乃俱投身而下正墮陵前而陵坐局脚牀斗帳中見昇長二人笑曰固知汝來乃授二人道畢三日乃還歸治舊舍諸弟子驚悲不息後陵與昇長三人皆白日冲天而去衆弟子仰視之久而乃沒於

雲霄也

雲臺治中內錄曰太上老君傳授雲臺正治官圖治山
竈鼎等得四十一代相承具人名代數於後

第一代老君老君火山大丹治法傳授三百人惟王方
平尹喜徐甲系代

第二代王方平授三十人茅濛孫盈章震系代

第三代章震授十七人若士李夫人名仙系代

第四代若士士授五十二人李元君及白石先生李常

在系代

第五代李元君授七十二人王子喬許述成系代

第六代諸仙別傳分散世絕系治官氣并治名老君於是再下平蓋山授張陵為雲臺治付以火芝火仙之經方術變化長生不死之藥登昇雲天之道勅為第六代道外孫而東海小童君為陵保舉師太上老君為度師度雲臺治封陵為天師天師授三百人唯張申趙昇李忠系代

第七代張申授三十三人唯李仲春李意期李玄系代

第八代李仲春授十五人李少君魏伯陽系代

第九代李少君授九十人纁巴李常存系代

第十代纁巴授五人陰長生李宙先系代

第十一代陰長生授八人張景霄王萬縉系代

第十二代張景霄授五人唯劉馮系代

第十三代劉馮授五人唯劉政系代

第十四代劉政授五人孫博嚴光系代

第十五代孫博授三人無可代者乃入林屋山中合龍
虎大丹而昇天治法又絕於是太上老君命李仲甫出
神仙人之都以法授江南左慈元放令繼為十六代師
第十六代左元放授八十人介象嚴光女季侗系代
第十七代介象授四十人李延張授萬葛卿阮王李用
系代

第十八代李延介談延談授十八人唯劉景系代

第十九代劉景授四人東海郭延系代

第二十代郭延授三十人唯靈壽光系代

第二十一代靈壽光光本外國人授十八人唯何述系代

第二十二代何述授十人羅先期系代

第二十三代羅先期授二十人甘季仁甘孝先系代

第二十四代甘孝先授五十一人唯石帆公系代

第二十五代石帆公授十九人宮戶系代一云宮中用戶字也

第二十六代宮戶授八十人無可傳者乃入南嶽及天台山經八十五年世絕老君於是再降廬山勅左元放授施存葛玄

第二十七代施存授七十人但皆地仙唯同學葛玄繼代

第二十八代葛玄授十九人張秦仇真李用系代別出第二十九代老君命紫衣使者下於廬山授五人尹思尹軌系代傳治思授七十人唯女子樊忠和韋義山系

代

第三十代尹軌授十九人唯女仙李元一系代

第三十一代女仙樊忠和授二人唯劉綱東陵母系代
第三十二代女仙李元一授四十人無一可傳治法又
絕

第三十三代劉綱綱樊夫人弟子雖居官治又其夫也
治法又絕

第三十四代張秦秦葛玄弟子也玄見代絕乃令秦授

十一人唯王列系代

第三十五代王列授九人許遜胡少真系代

第三十六代許遜授一百人無一可授系代又絕遜昇
天後兩代人民征伐真志不傳

第三十七代老君勅使三人於天台山令葛玄傳鄭思
遠授十九人葛洪李淳風系代

第三十八代李淳風授四十人有四人系代而未傳授
者二人為李道興李靖後又隱於房公之山一百年後

乃出授張常存李太虛李惠舉同太師神等四人

第三十九代李惠舉張常存而各分代傳授皆稱三十
九代孫惠舉授三十人唯三人可代李保真白玄中李
太昌張常存授三十七人唯三人願系代孫張真應真
孫道用

第四十代李保真授二十四治共百人唯林通元李德
仁系代

第四十一代林通元凡此以雲臺嗣法得並載

梁州記曰聶水北聶鄉山有仙人唐公房祠有一碑廟
北有大坑碑云是其舊宅處公房舉宅登仙故為坑焉
馮真人漢車騎將軍馮緄子也修煉於岳門山一日辭
父母謂當仙去呂來晨鶴飛為候父登山望之果然宋
直講黎錡詩少小厭塵土奮身避庭闈卜居托孤頂風
雨在茅茨朝元夜無寐絕粒朝不飢功成帝宣至召起
登太微 按廣安志為五代將軍馮勝之子未知孰是
靈驗記益州唐隆縣大通觀晉義熙元年乙巳置周末

摧殘僅存基址武德中邑人呂細因過其地遇一道士
乘青驢自天而下於觀基之內盤迴指畫良久昇天呂
細與范仲良同受其教即日共出金帛特造觀宇有紫
微閣高八十餘尺尤為宏壯太尉南康王常臯再加修
飾其側有市城觀在縣西南八里有石像天尊一十三
身高一丈三尺每至齋月吉晨鐘或自鳴夜有神燈晝
有仙人來往遠近共知焉

抱朴子曰岷山道士張蓋踰及偶豪成二人精思於蜀

雲臺山石室中忽有四人黃絹單衣葛巾往揖其前曰
勞乎道士辛苦幽隱於是二人顧視鏡中乃鹿也

范豺者巴西閬中人也久住枝江百里洲修太平無為
之道臨日噓漱頂有五色光起冬夏惟單布衣當桓溫
時頭已斑白至宋元嘉中狀貌不變其占吉凶雖萬里
外事皆如指掌或問先生是謫仙邪云東方朔乃黠賊
我小兒時數與之狡獪又云我見周武王伐紂洛城頭
戰前歌後舞宋文帝召見豺答詔稱我或稱吾元兇初

為太子豺從東宮過指宮門曰此中有博勞鳥奈何不
知文帝惡之勅豺自盡江夏王使埋於新亭赤岸岡文
帝令發其棺無屍乃悔越明年豺弟子陳忠夜起忽光
明如晝見豺入門就榻坐又一老翁後至豺起迎之忠
問是誰豺笑而不答須臾俱出門豺問忠比復還東鄉
善護我言訖不見按洞仙傳云范豺字子恭巴西閬
中人宋元嘉中聚名香數十斛細擣煮以作湯朝用湯
自浴正中湯盡不復聞聲侍者入看見豺還著故時布

衣披帽坐而無復氣江夏王令殯殮而不下棺蓋四日尸不臭送還葬於新亭豺亡時年四十九膚貌顏色猶如初劉凝之為豺作傳書置道書部不傳於世

隋程太虛西充人自幼好道精修勤苦隱居南岷山絕粒有二虎侍左右九井十三峰皆其修煉處也一夕大風雨砌下得碧玉印每乞符祈年印以授之輒獲豐稔唐元和中解體後遷神於玄宮容貌不變宣宗命人求之過商山宿逆旅躡險有居第如公館青童引見一道

士自稱程太虛祖居西充且囑曰明歲君自蜀過南岷
無忘我及至蜀熟視畫像與前見者無異宋賜號道太
師

王法進者劍州臨津縣人也孩孺之時自然好道家近
古觀雖無道士居然其嬉戲未嘗輕侮於尊像見必歛
手致敬若凜懼焉十餘歲有女官自劍州歷外邑過其
家父母託保護之與授正一延生籙名曰法進而專勤
香火護持齋戒茹栢絕粒時有感降是歲三川饑歉斛

斗翔貴死者十五六多採山芋野葛充饑忽有二青童
降於其庭宣上帝命曰以汝宿稟仙骨歸心精誠不忘
於道今以青童召汝受事於玉京也法進即隨青童騰
身凌虛徑達大帝之所命以玉盃霞漿賜之飲訖帝謂
曰人稟五行之大體天地之和氣得為人形復生中土
甚不易也而天運四時之氣地稟五行之秀生五穀百
果以養於人而人不知天地養育之恩輕棄五穀厭捨
絲麻使耕農之夫紡織之婦身勤而不得飽力竭而不

免寒徒施其勞曾不愛惜斯固神明所責天地不祐也
近者地司嶽瀆日有奏言人厭賤米麥不貴衣食之本
我已勅太華之府收五穀之神令所種不成下民饑餓
因亦責罰以懲其心世愚悠悠曾未覺悟旋奉太上所
勅以大道好生不可因彼惡民以害衆善雖天地神明
罪之愚民亦不知過之所起永無懺請首原之路虛受
其苦耳汝當為無上侍童入侍天府今且令汝下世告
諭下民使其悔罪寶愛桑蠶貴敬農事惜五穀百果知

大造之養人厚地之育物宗奉正道崇事神明至於水火之用不可厭棄衣食之養儉已約身皆能行此明戒天地愛之神明護之風雨順調家國安泰此乃增益汝之陰功也即命侍女披琅笈珠韞出靈寶清齋告謝天地法一卷付之傳行於世曰世人可相率幽崑高靜之處置齋悔謝一年之內春秋兩建春則祈於年豐秋則謝於道力如此則宿罪可除穀父蠶母之神為置豐衍也龍虎之年復當召汝矣命青童送還其家已三箇月

所受之書即今靈寶清齋告謝天地之法其法簡易與
靈寶自然齋大率相類人間行之立成徵効苟或几席
器物小有輕慢濁污者營奉之人少有不公心者即飄
風驟雨壞其壇筵迅雷吼雷毀其器用自是三川梁漢
歲皆崇事雖愚朴之士狂暴之夫罔不戰栗兢戒肅恭
擎跪知奉其法焉或螟蝗旱潦害稼傷農之處衆誠有
率勉於脩奉炷香告玄旦夕響應必臻其祐巴南謂之
清齋蜀土謂之天功齋蓋一揆矣法進以天寶十一年

壬辰歲雲鶴迎之而昇天此乃亦符龍虎之運云

胡尊師名宗自稱曰欒

孚郭切

居梓州紫極宮嘗泐江入

峽道中遇神人授以昇仙之道辯博該贍文而多能齋醮之事未嘗不冥心滌慮以祈感通梓之連帥賢相重德幕下盡皆時英碩才如周相國李義山輩加敬致禮其志泊如也洎解化東蜀顯跡涪陵方知其蟬蛻得道延永爾梓益褒閭間自王法進受清齋之訣俗以農蠶所務每歲祈穀必相率而脩焉至有白衣之夫緇服之

侶往往冒科禁而藏事者固以為常矣有郡人劉崧慕師之道德請於別地致齋師謂之曰夫嘯傳侶命儕友者猶須正席拂筵整籩洗爵恭敬以成禮嚴恪以致事尚懼其誚讓責其不勤況感降天真禱求福祐豈可隄然而賈罪乎俗之急情有自來矣子可訓勗於衆必精必虔乃可為之崧承命誓衆潔已率先而撰香花備壇墀師然後往既昇壇展禮思神之際黑雲暴起旋颯入座拔其二柱飄其竹席投其鎗釜於千步之外而後卒

事則融風熙熙祥氣亘野師詰所投之物其二柱嘗閣於豕圈之上竹席嘗蔽於產婦之室鎗釜嘗爨於絰經之家師曰器物不潔神明惡之況爾心乎心苟有疵行苟有玷雖百牢陳於席九韶奏於庭適足以瀆神明延災禍爾人之修心必使言行相脗内外坦然明不媿於人幽不慙於鬼吾知其可爾反於是而欲神歆鬼饗不亦難哉

唐王子蒙者養真於王望山手種樹大十圍者數株丹

竈石床尚存遺跡 按王望山在巴州之北岸自郡城
絕江而登山高二里許岩徑極險占一郡之勝相傳云
王真人得道此山真人名蒙故名王蒙山舊志云唐玄
宗控白驪至此山望見京闕曰此去京師不遠故名王
望

三洞珠囊曰謝自然女道士也果州人詞氣高異其家
在大方山下頂有古像老君其形自然因拜禮不願下
山母從之乃遷居山頂自此常誦道德經黃庭內篇於

開元觀受紫虛寶經下金泉山居之山有石壇煙蘿修竹一十三年晝夜不寢兩膝上忽有印稍小於人門官印四孺若朱有古篆六字桀如白玉忽日金泉道場有雲氣遮匝一川散漫彌久仙去其金泉碑畧曰天上有白玉壁上列真仙之名有人間壁亦仙名朱書注其字下曰降世為某官職又於所居堂東壁上書數字皆道德之意真跡存焉 按劉賓客嘉話錄云果州謝真人上升前在金泉山道場上帝錫以馬鞍使安其心也刺

史李堅遺之玉念珠後問念珠在否云已在玉皇之前
矣一日真人於紫極宮致齋金母下降郡郭處處有虹
霓雲氣之狀至白晝輕舉萬目覩焉唐范傳正謝真人
仙駕過舊山詩麾蓋從仙府笙歌入舊山水流丹竈闕
風起草堂闕白鹿行為衛青鸞舞自閒種松鱗未老移
石蘚仍斑望路烟霄外迴輿嶺岫間豈惟遼海鶴空歎
令威還夏方慶和云何年成道去綽約化童顏天上尋
真侶人間憶舊山桑田今已變蘿蔓尚堪攀雲覆瑤壇

淨苔生丹灶閑逍遙看白石寂寞閉玄關應是悲塵累
思將羽駕還宋李宏過謝真人舊宅詩昔時謝女昇天
處此日遺踪尚宛然蟬蛻舊衣留石室龍飛靈水湧金
泉碑書故事封蒼蘚殿寫真容鎖翠烟薄暮松巔聽鶴
唳猶疑彷彿下神仙

傳奇云許栖巖下第長安欲市一馬有道士能易請筮
之遇乾曰飛龍在天利見大人曰此馬龍種也栖巖入
蜀至劔閣馬驚墜萬丈崑底行出洞口見碧樹萬餘林

二玉女曰爾何人遽至太乙元君之室元君召曰爾在人間何好曰好道多讀老莊黃庭經元君曰三書各得何句栖巖曰莊子云真人息之以踵老子云其精甚真黃庭云思一部壽無窮元君曰子近道矣命飲石髓曰嵇康不能得爾得之數也俄有道士來元君曰請筭三事擘太華何神也立海橋何鬼也道士布筭良久曰擘太華雖云巨靈實夸父之神也立海橋雖云醜恠乃五丁之鬼也元君曰筭吾今夕何為曰今夕東遊三萬里

栖巖視道士乃昔日卜馬者謂栖巖乾卦今日中矣遂
巡有仙童曰東皇君請今宵曲龍山橋翫月元君謂栖
巖曰可同遊共跨鹿龍而去頃刻即至見危橋若長虹
亘天勢連河漢深入滄溟東皇命酌醴鸞歌鳳舞響徹
天外日輪潛湧命駕俱返元君曰爾飲石髓已得千歲
命牽栖巖馬來曰本吾洞之龍子因作怒傷稼責為負
荷與君緣合耳若到人間解之渭濱玉女曰龍子回日
號縣田婆針寄少許來跨馬食頃達號縣舊莊詢田婆

曰太乙家紫霄姊妹常寄信買針遂取針繫馬鬣放之
渭濱化龍而去

張英初拜儀隴縣尹過采石江遇一取水女子姿貌絕
世謂英曰五百年夙約與君當會於大儀山英叱之至
任幾半載日夕聞機聲一日率部衆逐機聲而往行數
里至大儀山上一石洞門鑰宛然門忽開前女出迎相
携而入洞門即閉從吏哀號忽圓石一雙自門隙出衆
取石歸近縣五里不能舉邑人建祠塑像置此石像腹

至今祈禱輒應廟曰永濟

王隱居棲妙山記云田真人諱大神自南陽來隱棲妙山觀中山峻林叢多蛇虺田有神術驅絕之修煉久一日值江漲溢岸乃遊水上若履坦途唐廣德間登會仙橋上昇先是常與一道流奕撒碁於江人拾之甚奇異獻蜀主旋復不見後又得於玉局洞前石盤內自是江中產碁石至宋封為妙濟真人

南江志云黃蓬石乃大蓬之仙者性頗蒙惟充薪水役

偶汲於河見金瓶貯水乃飲水而置瓶是夕勞困卧藩
籬間仙師應長官呼而授之丹曰賴子不取金瓶也因
茲忽穎悟能詩與蓬之名士何正輔遊賡和至百餘篇
句力愈健何終不能出其右居頃之隱於大蓬不見見
銅人觀碑刻

夷堅志王杞字昌遇梓州人為獄吏日暮懷金與妻妻
欲試之值遣婢餽食有失犯訊婢引伏而逐之將出門
妻言曰君為推司日持錢歸我固疑為煅煉成獄姑以

婢試耳安有是哉杞大悟取筆題壁曰枷拷推求只為
金轉遭冤債幾何深從今不願為刀筆放下歸來遊翠
林乃棄吏居長平後遇異人授以仙訣詩百篇深契易
理大中十三年九日舉家仙去郡人即其處祠祀之雨
暘疾疫隨禱輒應大觀二年賜號保和真人按成都
府東度人觀一名大道重陽觀云唐保和真人修煉處
名山志云張守虛嘗賣藥梓州號落魄仙曾過縣之延
禧山訪友爾朱氏後以九日飛昇現身於東方青雲之

際人指其處為落魄山

續仙傳大中十二年東川奏劍州梓潼縣道士馬自然
白日上昇時於東川謂人曰我鹽官人也新羽化於浙
西今又為玉皇所詔於此上昇以其事奏之遂勅浙西
道杭州覆之發塚視棺乃一竹杖而已

張笑桃者南江人相傳古清州知州王鶚子讀書於義
陽山忽一女子至前自稱名曰張笑桃言罷題紅梅詩
於壁上墨跡未乾遂不見詩云南枝向煖北枝寒一種

春風有兩般頻上高樓莫吹笛大家留取倚欄看

野人間話云利州南門外乃商賈交易之所一旦有道士羽衣襍纓來於稠人中賣葫蘆子種云一二年間甚有用處每一苗只生一顆盤地而成魚以白土畫樣於地以示人其模甚大逾時竟無買者皆云狂人言不足聽道士又以兩手掩耳急走言風水之聲何太甚耶巷陌孩童競相隨而笑侮之時呼為掩耳道士至來年秋嘉陵江水一夕泛漲漂數百家水方渺瀰衆人遙見道

士在水上坐一大瓢出手掩耳大叫水聲風聲何太甚
耶泛泛而去莫知所之

錄異記云蜀永平四年甲戌利州刺史王承賞奏深渡
西入山二十里道長山楊謨洞在峭壁之中上下懸險
人所不到洞中元有神仙或三人或五人服飾黃紫往
往出見是時所見人數稍多詔道門威儀凝真太師默
鑒先生任可言內大德施昭訓齋青詞御香與內使楊
知淑同往醺謝又復出見如初詔改景谷縣為金仙縣

道長山為玄都山楊謨洞為紫霞洞仍封玄都山主者
為王清公置紫霞觀以旌其事 按文同利州綿谷縣

羊摸谷仙洞記熙寧庚戌春余還朝過利州通判寇誼
恭甫為余言近季按朝天驛人云去此七八里巖谷中
有神仙常出見洞口因往觀之自龍洞閣具舟西下過
小峽有山峽然崛起萬仞翠壁如削中闢大門可五六
丈時正晴日光下照有二童子先出次有一人白衣皂
巾曳杖垂長髯襟帶隨風翩然往來下視久之左右數

青衣從行有物若雞犬若虎若鹿者先後之又有執扇
與繖者隱隱若繪畫甚可愛人之長者裁尺餘舉止詳
緩如人行二十里許乃不見問其下居民云相傳五代
時土人有王姓者種山下盡室斂穫於此因遣婦去求
水婦汲還路有病僧創穢甚滿身腥腐不可近輒前索
飲婦惡之且懼未始見弛擔走僧遽就器飲殆半遂去
婦不能易之隱其事置水田上其家人無少長咸來飲
盡之婦以故獨不需口晚又伴婦致饌既至其所得飲

僧餘水者盡飛入此洞婦既不見但號哭奔走踣躄跳盪如狂人忽聞在洞中呼婦者婦仰應不得去懊恨至死自後莧童牧叟常慣見不以為異近年每至天色開霽則出出必盡日就中山間花木盛發時出尤屢寇乃取畫圖示予余曰嚮嘗讀封禪記見祥符中利州路轉運使李允元奏綿谷縣羊摸谷內山洞中有神仙見自言嘗往見凡三數人或立或行衣裾皆有異光至日暮方沒蓋此地爾因求其圖之別本以歸壬子秋余移守

興元有新府從事賈君瑄自南榮訪余於陵陽見圖屏
上乃言其向官洋州時常與太常博士陸丕考較進士
於寧武亦聞之歸日與丕詣洞下同立良久其見果不
妄指圖之澗壑巒嶺谿谷磴道曲折出沒一一盡如此
俞侯之彥在座遂卷圖去命工摹之且俾余次其事列
之圖上余為記此九月二十三日記

普州圖經陳搏字圖南崇龕人方四歲戲渦水側有青
嫗抱懷中乳之聰悟日益既長辭父母去學道或居亳

為毫人或居洛為洛人或居華山為華山人太宗令見
真宗於壽邸及門而返曰王門廝役皆將相材也何必
見王乃賜號希夷先生 按安岳治西有破石井中分
出水世傳希夷先生所鑿治北方池有手植蓮多喜山
有丹爐石枕皆其遺跡

宋羅晏閬中人兒時牧山下見二道人奕晏舍牧觀之
道人出囊中物與食晏食已歸家覺腹中如燎因發狂
累日自是惟飲水數日不一食稍稍預言禍福無不驗

宋宣和中賜靜應處士張浚延至軍中晏曰相公勿恐
明日敵退果然加號太和冲夷先生蜀人相傳壽至一
百八十云

夷堅志云虞雍公自渠州守召至行在憇北郭外接待
院因道中冒暑得疾瀉痢連月重九日夢至一處類神
仙居一人被服如仙官延坐視壁間有韻語藥方讀之
其詞曰暑毒在脾濕氣連脚不泄則痢不痢則瘡獨煉
雄黃蒸餅和藥甘草作湯服之安藥別法治之醫家大


錯如方服之遂愈張世南曰予在蜀中遍訪林下人求獨煉法鮮有能者忽一日得青城山道友傳授云丹經謂捉得龍伏得雄言雄黃見火則飛走為烟焰最難伏也其法用雄黃不拘多少研細乾鍋火內煨令通紅取出攪雌黃末焰硝末急用桃枝攪轉即成水矣急傾出瓦堞微側堞子則清者一邊俟凝取出去麤者研細以宿蒸餅為丸如菉豆大每服三丸至七丸如前法服雄黃末一兩大約用焰硝一錢此乃竈家秘法得之甚艱

古人云施藥不如施方故詳紀之

無著道君姓趙氏諱法應梓州飛鳥人也宋寧宗慶元乙卯上巳日生於縣之趙村埡其夕光燄燭天村中林木皆作金玉色有香雲芬馥天花布空之異七歲讀經書以一覽輒盡弱冠出家於縣之雲臺山時則嘉泰丙寅之年矣攷志飛鳥元時始併入中江縣山無雲臺名惟云中江南百七十里有飛鳥山甚峻或即其地也道君既入山誅茆修煉遠近來學者日衆乃營一殿崇事

玄帝土木已畢琢石粗具一夜椎鑿聲徹於空谷遲明視之瑤階忽成自天界地界至水陽界咸整齊焉已於本村設爐范玄聖像高丈二尺按劍長七尺二寸以應七十二候歲癸酉告成筮迎導之期曰重陽子時吉先一日道君躬行巡視位置畢謂門人曰觀名佑聖殿名普應可也次日辰時雲日開朗中隱隱有靈旗搖映香風襲人大衆歡闐之間道君忽然端坐而化偈云拓落一貧道謫凡十有九紀其歸去時在處重陽酒門人龕

其蛻於殿西偏五百餘年乃遭火劫神光未泯締構加
崇焉



蜀中廣記卷七十六

欽定四庫全書

史部

蜀中廣記卷七十七至

詳校官編修臣翟槐

編修臣程嘉謨覆勘

總校官庶吉士臣何思鈞

校對官學正臣陳本

謄錄監生臣曹錫爵

欽定四庫全書

蜀中廣記卷七十七

明 曹學佺 撰

神仙記第七

附錄道證

雲笈七籤云昔有精進賢者夏日過蜀山栖息於古樹下嘆曰日已向中何由得食樹忽應聲當為賢者設供無憂也須臾出食食訖賢者謝曰不審大神可暫相見

否荅曰我昔為工匠役於道觀道人授我戒使日中食行之數年為婦所壞死去天罰我主本山千歲樹精每至日中輒給食惟無緣遷去耳我姓名家居某所賢者過彼幸傳語家人建齋三日使此身脫離便得生天矣賢者如言訪至其家具告之他日復過樹見神曰承賢者傳信建齋某即得飛行景霄之上受署為散仙人矣言訖而隱

靈驗記云隋室王謙以後周舊臣勲名素重恐禍及身

遂據三蜀圖變文帝出師征之不克兵士多病死者相枕乃於內殿修黃籙道場祈天請祐三日夜夢神人降曰帝王上承天命下順人心天人合符然後有國今陛下革周立隋天所命也王謙一人之力安能敵四海乎帝曰克蜀弔民誠不獲已但主帥疾疫以此為憂爾神曰北人不堪瘴毒故多疾疫壇中法水可以救之即取禁水向西南嚙曰雨至即愈無煩聖慮也子日進軍必克軍中奏某夜雷雨灑於營壘之上三軍皆蘇其後王

謙傳首三蜀底寧果是子日矣

王局化西王母塑像多年因南詔薄城燒燬廊屋雖顏而儀像不損殆有靈焉居人范彥通者患風癩眉鬚漸落因入觀發願疾較損即竭力修裝是夕夢一王女手執花盤以衣袖拂其身曰王母令我救汝覺而起數日之間瘡腫皆息眉鬚復生遂造紗牕裝金彩通檐兩楹煥然一新觀中有三將軍者亦古所塑居人閩士林臥疾月餘迨將不救夢三將軍以戟揮其身上穿一物去

狀如黑犬自此疾愈乃捨衣物重加彩績焉

青城山丈人觀真君像冠蓋天之冠着朱光之袍佩三
亭之印以主五嶽威制萬神開元中明皇感夢乃夾紵
製像送至蜀中自天國山移觀於今所蓋取春秋祭祀
去縣稍近也數十年來冠色宛如新製有村人無知以
賦稅所迫徵促鞭箠一夕走投觀中齋三數錢神香抵
觀燒爇告以其故乞真君頭冠賣以充稅因睡忽夢真
君謂曰我頭冠非純金乃金箔耳賣無所直縱售亦為

官中所責其禍不小山門廟前有十千錢埋碑傍木葉
下可取去官稅之外資汝家產其人喜謝訖乃掘山得
錢上租既畢家亦漸富至今真君頭冠低俯向前傳云
神令此人驗冠非純金所以然矣

成都楊鬧兒父母崇道奉事老君極精勤鬧兒以軍伍
中在金堂把截為敵擒至南山寨囚之晝夜常念老君
願再見父母忽夢老君賜雲一朵令童子引之送於平
地曰可以歸矣及覺身已出寨奔走到家父母為其作

百日叅訖

果州開元觀接郡城頗為爽塏以形勝之美選立觀額
雖州使旒具結奏而制置之內猶闕大殿州司差工匠
及道流將泝嘉陵江於利州上游採買材木臨行夢神
云朱鳳潭中有木可足用如此者三因聚議曰夢兆如
斯必有大商貨木泐江而至或可免遠適耶乃往山下
尋候之徘徊岸旁隱隱見潭底有木因募工鉤求得梓
木千段竟構成大殿鐘樓經閣三門廊宇咸得周足又

市埽荒壇內有黃赤色者疑其火力未足棄而不用信宿皆化為金起觀之費過於豐資殿宇既成將塑尊像又於白鶴山觀掘地得鐵數萬觔因鑄像三尊高二丈今謂之聖像也

定州人趙業開成中為閬州晉安令因疾暴卒三日乃蘇云初為冥官追急問所以但云為欠債抵諱事自思無有也必是誤追行三五十里過一山有宮闕崇麗人物甚多一青衣童前問非道士趙太玄乎荅云非也童

咲曰豈得便忘耶又一童云太上令喚趙太玄追事人
一時散去自與童子到宮闕但見一道流云汝六歲時
有疾受正一八階法籙名為太玄豈得流於俗官併忘
此事太乙有命放還却須佩籙修真行功及物居官勿
貪瀆輕人性命言訖而去既疾蘇於思依山參受法籙
累置壇場廣成功德復名太玄

唐太中年合州慶林觀多年摧朽殿宇不修穿漏尤甚
刺史楊師謨夢太上示現而左目有淚痕乃巡謁諸觀

朝禮及至慶林方驗尊像左目前雨漏滴痕宛若垂淚
因刻薙荒蕪恢張制度創兩殿二樓重門邃宇壯麗於
時既夢太上曰子以崇葺之功上簡玄府當流化十郡
矣其後師謨累典符竹果如神言志云即奉真觀也

李瓊咸通中為王府長史以勲貴之族不慣食貧居閒
力闕鬱鬱不得志忽夢入深山窮谷棧閣縈折流水潺
湲如此者不知其幾千百里又見闌闌雜遝城闔爽塏
飛宇橫樓摩霄檠日不知其幾千萬家縱神遊目熙熙

自得又出郊甸涉岡原荒榛茂草小松巨木間以果林
厠以筠篠山嶺危峭或迂或平山迴逕盡抵一小郡茅
棟縱橫隘路欹側傍有公署署內白氣屬天其大如屋
中有悲歌號呼之聲見一青童引環即路躡危磴步石
梯入門甚峻門內古樹芳草若古觀宇焉環素崇玄教
頗為慰悅俄而昇殿見像設尊儀笑而謂之曰爾來耶
吾待久矣入天門漱玄泉古人所修也注丹田存白元
上士所修也混而合之子其行之陰功及人陰德濟物

千百之家待子而字之勉哉勉哉明年之春瓌再拜稽
首受其言而覺是冬頻訴於宰執復希入用乃授陵州
刺史之任所歷山川郡邑神思愴恍皆如常所經行抵
郡乃謁天師升階及門至於殿所覩其真像侍衛屋宇
布列醒然而悟叶昔夢矣乃以俸金修天師堂加以丹
牖立為碑誌其白氣屬天乃鹽井之所也悲歌之聲乃
轉車之人也瓌即西平王孫

錄異記云仙人許君居世時嘗因修觀工用既畢欲刻

石為記因刻去古碑舊文刊勒新記自是恍惚不安暇日徐步庭砌聞空中語曰許君許君速詣水官求救不然即有不測之災許愕然異之問其事杳不復荅乃炷香虔祝願示其因良久復聞曰所刻碑舊文雖已磨滅而當時為文之人見詣水官相訟奪我之名顯彼之名水官將執對矣宜速求之許君乃訪得舊文重為立石一夕夢人謝云再顯名氏無以相報請作水陸大醮普告山川萬靈得三官舉明可以證道也君依教修之成

都道士楊景昭說此

范希越成都人虔事北帝雕天蓬印以行教祭醮嚴潔尤逾於常廣明庚子三月不雨至五月人心焦然穀稼將廢希越願於萬歲池試行神印為生靈祈請先詣至真觀致齋是日庚辰以戌時投印池中陰風遽起雲物周布亥時大雨達曉及辰至巳少霽乃歸昇僊橋水漸及馬腹羅城四江平岸流溢螟蝗之屬淹漬皆死自是遂有年僖宗駐成都召對問以逆寇誅鋤宮城克復之

事命持印於內殿奏醮積雨之中雲霽月朗是夕上夢
神明告之佳兆因大悅授太常寺奉禮郎累遷主客員
外衛尉少卿錫以朱紱黃巢捷至果符聖夢焉希越自
言初居煮膠巷印篆初成而蠻寇凌突居人奔散藏印
於堂屋瓦中蠻去之後四隣焚燼其所居獨存

彭城劉存希自幼於唐興觀瞻禮天師圖寫絹本出入
護持雖祇命遠行奉使南北未嘗一日闕香火黃巢犯
闕時在內署蒼惶之際隨駕不及唯捲天師幘捧持而

行同伍三十餘或為擄捉或被殺傷身獨得免將奔入
南山夜深村落行次遇被難人偶語而聞妻在其間因
得同往洋州大巖山深處結草庵居沉素無骨肉唯夫
婦而已既免支離決志林谷不復有名宦之望野麋山
鹿性已成矣山下居人以其口食不多時亦助其糧儲
饋其鹽酪此外拾栢子焚香禮敬天師而已無何舊交
宋開府入掌樞務知其在洋山中強之使出加以品位
固辭不獲黽俛從焉值駕出石門因復奔竄投匿莎城

山中數月有軍士搜山谷不得安居夫婦棄繒帛之衣
夜行四十餘里出及平陸遙見馬軍十餘騎兩面交至
已擒擄行人數輩存希夫婦驚恐而立馬軍過其側似
若不見由是得免後數年奉使西川携天師幘而至為
言此事

成都賈瓊三歲時其母因看蠶市三月三日過龍興觀
因衆齊受籙遂為瓊受童子籙一階十餘年後因女兄
有疾其母請處士吳太玄為入冥看檢致疾之由仍看

瓊年命凶吉經宿太玄還言疾在江瀆求之即差籍中
不見有賈瓊名父母愈憂復請看之太玄每與人入冥
檢事必鑠於一屋中安寢而往不許人驚呼候其自醒
喚開門乃出厯厯說冥中事有如目擊言必信驗或兩
宿然後回及再往檢瓊名字云三歲上巳日於龍興觀
受正一籙名係天府不屬地司乃於天曹黃簿之內檢
得其名

雲溪友議云唐西川節度使韋臯少遊江夏止於姜使

君館姜氏孺子曰荆寶已習二經雖兄呼於韋而恭事之禮如父也荆寶有小青衣曰玉簫纔年十歲常令祇侍韋兄玉簫亦勤於應奉後二載姜使君入闕而家累不行韋乃居上頭陀寺荆寶亦時遣玉簫往役給奉年稍長大因而有情時廉使常侍得韋季父書云姪臯久客貴州切望發遣歸覲廉使啟緘遺以舟楫服用仍恐淹留請不相見泊舟江瀨篙工促行韋拭淚裁書以別荆寶頃刻寶與玉簫俱來既悲且喜欲命青衣從往韋

以違觀日久不敢俱行乃固辭之遂與約少則五載多則七年來取因留玉指環一枚并詩一首遺之暨五年不至玉簫乃靜禱於鸚鵡洲又逾年不至玉簫歎曰韋家郎君一別七年是不來耳遂絕食而終姜氏愍其節操以玉環着於中指而用殯焉後韋鎮蜀到府三日詢獄囚輕重之繫近三百餘人其中一輩五器所拘偷視廳事私語云僕射是當時韋兄也乃厲聲曰僕射僕射憶姜荆寶否韋曰深憶之曰即某是也公駭然曰犯何

罪而重繫荅曰某別後尋以明經及第再選青城縣令
家人誤焚解舍庫牌印等韋曰家人之犯固非已尤即
與雪冤仍歸墨綬乃奏眉州牧敕下未令赴任遣人監
守且留賓幕時屬大軍之後草創事繁凡經數月方問
玉簫何在姜曰僕射維舟之夕與伊留約七載是期既
逾乃絕食而終因吟留贈玉環詩云黃雀銜來已數春
別時留解贈佳人長江不見魚書至為遣相思夢入秦
韋聞之益增悽歎乃廣修經像以報夙心且想念之懷

無由再會時有祖山人者治少翁之術能令逝者相親
但令府公齋戒七日齋已清夜玉簫乃至謝曰承僕射
為造經像之力旬日便當託生却後十三年再為侍妾
以謝鴻恩臨別微笑曰丈夫薄情令人死生隔矣後韋
以隴右功終德宗之代理蜀不替年深累遷中書令天
下響附瀘焚歸心因作生日節鎮所賀皆貢珍奇獨東
川盧八座送一歌姬未當破瓜之年亦以玉簫為號諦
觀之乃真姜氏玉簫也中指有肉環隱出不異留別之

王環馬韋歎曰吾乃知存歿之分一往一來皆不爽矣
北夢瑣言章孝子名全益東蜀涪城人少孤為兄全啟
養育母疾全啟割股肉以饋而瘳他日出遊殂於逆旅
全益感天倫之思制斬衰之服以兄割肉飼母遂以火
煉指用申至痛仍寫銀字法華經一部日夕諷誦粗通
大義後於成都府樓巷築舍其間傍有丹竈不畜童僕
塊然一室鬻丹得錢數萬兩以金刻母像今華亭禪院
即居士高樓之所也嘗言於道友曰點水銀一兩止一

兩銀假若作丹三百粒每粒百兩銀三十千矣其利溥哉居士製土偶於丹竈之側以代執熱之用護惜不毀殆四十年大順中物故年九十八寺僧寫真於壁節度判官眉州刺史馮涓讚之

野人間話云利州市鄺中有一人被髮跣足衣短布襦與人語多是天上事或遇紙筆則欣然畫樓臺人物執持樂器或雲龍鸞鳳之像夜則宿神廟中人謂之天自在州南有市人甚闐咽一夕火起天自在於廟中獨語

曰此一方為惡日久天將殺之遂以手探堦前石盆中
水望空澆灑逡巡有異氣自廟門出變為大雨盡滅其
火掌廟者見之聞於人天自在遂潜遁去其後居人果
為大水漂蕩始信前言有徵

唐雅云會昌中蜀青城山邢道士者妙於方藥會穆宗
患心熱醫療罔效遣使召之邢既至以肘後綠囊中青
丹兩粒及紫梨數枚絞汁而進服之疾尋愈旬日內所
賜萬金加號廣濟先生帝從容問丹何物先生曰赤城

山頂有青芝兩株太平南溪有紫花梨一樹臣昔歲曾
遊二山偶獲兩實合煉成丹五十年來服食殆盡唯餘
兩粒幸逢陛下服之更欲此丹須求二物也經數月辭
歸帝後疾復作再詔之不知何適

閬中雍孝聞政和中以道士入宮說法徽宗謂其得林
靈素之半時人因呼為木先生

宋史鄭榮者本禁軍也戍壁州還夜遇神人謂曰汝有
道氣勿火食因授以醫術救人上賜名自清度為道士

居上清宮所傳藥能愈大風疾求之者皆刺臂血和餅給焉

明道雜誌云張文定以端明學士尹成都值藥市日其門暨李生因市藥遇一老人相與問訊曰張公已再鎮蜀矣文定實始一至老人似言其前身事也又曰今有藥二粒君為我達於公或公疑不肯餌則以一粒烹水銀俟汞成金可無疑也李生以藥獻公公素好道聞之甚喜乃於府第小亭躬取水銀搆火投藥一粒烹之聲

如粥沸有紅光自鼎中起俄頃光罩一亭而鼎中聲亦
屢變火滅視鼎中爛然餅金矣公即取餘一粒服之壽
八十五終身無疾坐而逝殯後柩有大聲豈其尸解乎
不然神丹在腹豈與常人同腐也先時公子恕說藥金
一兩許公令作四指環其一公以奉其父其一與其夫
人其一長子其一以自服父夫人長子皆前沒金亦隨
葬獨公者猶在恕言此時公尚無恙意今亦葬之矣某
嘗問恕以公居常導養之方恕亦不盡知其深妙處但

言公自中年後即清居獨坐一堂每旦起即徐步周環約五里所日以是為常不見別有施為也少時服朱砂又服天門冬既老亦罷之公年八十餘時某猶見之視其頤頰白膩如少年然喜飲酒量絕人晚年病目亦其毒也公言頗得彭老御內之術屢以試用唯一次實覺精氣上遡至腦耳他時不覺也

輿地紀勝云漢州人羅天祐來游長安若顛若狂善言人得失嘗隱語書解榜封以寄人及撒棘無不驗後於

成都司戶薛紱坐上化去

蜀中廣記卷七十七

欽定四庫全書

蜀中廣記卷七十八

明 曹學佺 撰

神仙記第八

附錄方術

任文公巴郡閬中人也父文孫明天官風星祕要又曉遁甲能役使鬼神文公少修父術州辟從事哀帝時有言越雋太守欲反刺史大懼遣文公等五從事檢行郡

界潛伺虛實共止傳舍時暴風卒至文公遽起白諸從事促去當有逆變來害人者因起駕速驅諸從事未能自發郡果使兵殺之文公獨見免後為治中從事時天旱白刺史曰五月一日當有大水其變已至不可防救宜令吏人豫為其備刺史不聽文公獨儲大船百姓或聞頗有備防者到日日甚烈又急命促載使白刺史刺史笑之日將中天北雲起須臾大雨至晡時湍水涌起十餘丈突壞廬舍所害數千人文公遂以占術馳名辟

司空掾平帝即位稱疾歸家王莽篡後文公推數知當
大亂乃課家人負物百斤環舍趨走日數十時人莫知
其故後兵寇並起其逃亡者少能自脫惟文公大小負
糧捷步悉得完免遂奔子公山十餘年不被兵革公孫
述時蜀武擔石折文公曰噫西州智士死我乃當之自
是常會聚子孫設酒食後三月果卒故益部為之語曰
任文公智無雙

後漢書楊由字哀侯蜀郡成都人也少習易并七政元

氣善風雲占候為郡文學掾時有大雀夜集於庫樓上
太守廉范以問由對曰占郡內當有小兵然不為害後
二十餘日廣柔縣蠻夷反殺傷長吏郡發庫兵擊之又
有風吹削哺太守以問由對曰方當有薦木實其色黃
赤頃之五官掾獻橘數苞由嘗從人飲勅御者曰酒若
三行便宜嚴駕既而趣去後主人舍有鬪相殺者人問
何以知之由曰向社中木上有鳩鬪此兵賊之象也其
言多驗著書十餘篇名曰其平 按益部耆舊傳文學

令豐持雞酒以奉由時有客不言客去豐起欲取雞酒
由止之曰向風吹削肺當有持雞酒來者度是二人豐
曰實在外須客來取耳 顏氏家訓曰削肺削札牘之
枅耳古者書誤則削之風角書曰庶人風者拂地揚塵
轉削也

段翳字元章廣漢新都人也習易經明風角嘗告大度
守津吏曰某日當有書生二人荷擔問翳舍處者幸為
告之後竟如其言又有一生來學積年自謂略究要術

辭歸鄉里翳為合膏藥并以簡書封於筒中告生曰有
急發視之生到葭萌與吏爭渡津吏搥破從者頭生開
筒得書言到葭萌與吏鬪頭破者以此膏裹之生用其
言創者即愈生歎服乃還卒業翳隱居竄跡終於家門
人稱為段夫子

王符論曰郭玉者廣漢人也初有老父不知何出常漁
釣於涪水因號涪翁乞食人間見疾者時下針石輒應
時而見効乃著針經診脉法傳於代弟子程高尋求積

年王乃授之高亦隱跡不仕和帝時王為大醫丞多有
効應帝奇之乃試令嬖臣美手腕者與女子雜處帷中
使王各診一手問所疾苦王曰左陽右陰脉有男女狀
酷異人臣疑其故帝歎息稱善王仁愛不矜雖貧賤廝
養必盡其心力而至療貴人時或不愈帝乃試令貴人
羸服變處一針即差召問狀對曰醫之為言意也腠理
至微隨意用巧針石之間毫芒即乖神存於心手之際
可得解而不可得言也大貴者處尊高以臨臣臣懷怖

懾以之其為療也有四難焉自用意而不任臣一難也將身不謹二難也骨節不强不能使藥三難也好逸惡勞四難也針有分寸時有破漏重以恐懼之心加以裁慎之志臣意且猶不盡何有於病哉此其所為不愈也帝善其對年老卒官

論衡曰廣漢陽翁偉能聽鳥獸之音乘蹇馬之野而田間有放馬者相去數里鳴聲相聞翁偉謂其御曰彼放馬目眇其御曰何以知之曰罵此轅中馬曰蹇馬蹇馬

亦罵之曰眇馬御者不信使往視之馬目竟眇

益部耆舊傳曰楊宣為河內太守行縣有羣雀鳴桑樹上宣謂吏曰前有覆車粟此雀相隨欲往食之行數里果如其言

拾遺記云周羣字仲直巴西閬中人也入岷山采藥見一白猿從絕峰下對羣而立羣抽所佩書刀投猿猿化為一老翁手握玉版長八寸羣駭問曰翁是何年生荅曰已衰邁也忘其年月猶憶軒轅之時始學厯數風后

容成皆黃帝之史就余授歷術至顓頊時考定日月星辰之運尤多差異及春秋時有子韋子野裨竈之徒權畧雖驗未得其門邇來世代興亡不復可記因以相襲至漢洛下閎頗得其旨也言訖以版授羣忽然不見羣由是精勤算術及考校年厯之運驗於圖緯知蜀應減及明年歸命奔吳之兆蜀人稱為後聖

沈約蜀閬公傳曰梁天監中有蜀閬公者以術謁武帝帝見之甚悅因命沈隱侯約作覆將與百寮共射之時

太史適獲一鼠約匣而緘之以獻帝筮之遇蹇之噬嗑
帝占成羣臣受命獻卦者八人有命待成俱出帝占決
寘諸青蒲中命閻公揲著對曰聖人布卦其象告矣依
象辨物何取異之請從帝命卦時八月庚子日巳時閻
公奏請沈約舉帝卦上一著以授臣既撰占成置於青
蒲而退讀帝占曰先蹇後噬嗑是其時內艮外坎是其
象坎而盜其鼠也居蹇之時動而見噬其拘繫矣噬嗑
六爻四無咎一利艱貞非盜之事上九荷校滅耳凶是

因盜獲戾必死鼠也羣臣蹈舞呼萬歲帝自矜其中頗有喜色次讀八臣占詞或辨於色或推於氣或取於象或演於爻或依鳥獸龜龍陰陽飛伏其文雖玄遠然皆無中者末啟闢公占曰時日王相必生鼠矣且陰陽晦而入文明從靜止而之震動失其性必就擒矣金盛之月制之必金子為鼠辰與艮合體坎為盜又為隱伏隱伏為盜是必生鼠也金數於四其鼠必四離為文明南方之卦日中則是沉陰類乎爻之九四死如棄如寘其

事也日殺必死既見生鼠百寮失色而尤闔公曰占辭
有四今者唯一何也公曰請剖之帝性不好殺自恨不
中及至日昃鼠且死矣因令剖之果姓三子是日帝移
闔公於五明殿西閣示更親近其實囚之唯朔望伏臘
得於義賢堂見諸學士軍國疑議亦莫不參預焉

袁天綱蜀郡成都人父璣梁州司倉祖嵩周朝厯健為
蒲江二郡守車騎將軍曾祖達梁朝江黃二州刺史天
綱少孤貧好道藝精於相術唐武德中為火井令貞觀

六年秩滿入京太宗召見謂曰巴蜀古有嚴君平朕今有爾自顧何如對曰彼不逢時臣遇聖主臣當勝也隋大業末竇軌客遊劔南德陽縣與天綱同宿以貧苦問命天綱曰君命上伏犀貫玉枕輔角又成就從今十年後必富貴為聖朝良佐右輔角起兼復明當於梁益二州分野大振功名武德初軌為益州行臺僕射既至召天綱謂曰前於德陽縣相見忘耶深禮之更請為審天綱瞻視良久曰骨法成就不異往時然目色赤脉貫童

子語亦浮面為將多殺人願深自戒後果多行殺戮武
德九年執被徵詣京謂天綱曰更得何官對曰面上家
上坐位不動輔角右畔光澤更有喜色至京必蒙聖恩
還來此任其年果重授益州都督天綱初至洛陽在清
化坊安置朝野歸湊人物常滿是時杜淹王珪韋挺三
人來見天綱謂淹曰蘭臺成就學堂寬廣必得親糾察
官以文藻見知謂珪公法令成就天地相臨從今十年
當得五品要職謂挺公面似大獸文角成就必得貴人

攜接初為武官又語淹二十年外重恐三賢同被責黜
暫去即還後淹遷侍御史武德中為天策府兵曹文學
館學士王珪為太子中允韋挺自隋末隱太子引之為
率武德六年俱配雋州淹等至益州見天綱請曰袁君
前日洛邑之言皆如高旨今形勢如此更為一看天綱
曰公等骨大勝往時不久即回終當俱享榮貴至九年
六月俱追入又過益州造之天綱曰杜公至京即得三
品要職年壽非天綱所知王韋二公在後當得三品兼

有壽然晚途皆不深遂韋公尤甚及淹至京拜御史大夫檢校吏部尚書贈天綱詩曰伊呂深可慕松喬定是虛乘風終不得脫屣欲安如且珍紉素美當與薜蘿踈歸逢楊得意非復久閒居王珪尋為侍中出為同州刺史韋挺歷蒙州刺史並卒於官皆如言貞觀八年敕詣九成宮於時中書舍人岑文本來見天綱曰舍人學堂成就眉覆過水文才振於海內頭有生骨猶未大成後視之全無三品前視三品可得然四體虛弱骨肉不相

稱得三品恐是損壽之徵後文本官至中書令尋卒房
玄齡與李審素同見房曰李君恃才傲物書生得相何
官荅云五品未見若六品已下清緊官有之李不復問
云視房公得何官天綱云此大人富貴公若欲得五品
即求此人李初不信後房公為宰相李為起居舍人卒
高宗往言令房贈五品官房奏贈諫議大夫馬侍御張
行成馬周同詣天綱天綱曰馬侍御伏犀貫腦兼有玉
枕文背如負物當富貴不可言近古以來君臣道合罕

有如公者但面色赤命門色黯耳後骨不起且又無根
恐非壽者後位至中書令兼吏部尚書卒年四十八謂
行成曰公五岳四瀆成就下亭豐滿得官雖晚終居宰
相之地行成後至尚書右僕射申公高士廉謂天綱曰
君後更何官天綱曰自知相祿已絕不合更有恐今年
四月大厄不過四月果卒矣先是蒲州刺史蔣儼幼時
天綱為占曰此子當累年幽禁後大富貴從某官位至
刺史年八十三其年八月五日午時祿絕儼後征遼東

沒賊囚於地牢七年高麗平定歸得官一如天綱所言
至蒲州刺史八十三謂家曰袁公言我八月五日祿絕
其死矣設酒饌與親故為別果有勅至放致仕遂停祿
後數年乃卒李義府僑居於蜀天綱見而奇之曰此郎
貴極人臣壽不長耳因請舍之指其子謂李曰此子七
品相願公挈之義府許諾因問壽對曰五十二外非所
知也義府後為安撫使李大亮侍中劉洎等連薦得召
見自門下典儀超拜監察御史其後位壽皆如天綱之

言贊皇公李嶠幼有清才昆弟五人皆年不過三十而卒唯嶠已長成矣母憂之益切請天綱天綱曰郎君神采清秀而壽恐亦不出三十其母大以為感嶠時名振咸望貴達聞此言不信其母盛饌延袁坐細診視云定矣又請同嶠書齋連榻而寢袁登牀穩睡嶠獨不寢至五更忽睡袁適覺視嶠無喘息以手覆之鼻下氣絕初大驚恠良久偵候其出入息乃在耳中撫而告之曰得起賀其母曰數候之皆不得今方得之郎君必大貴壽

是龜息也貴壽而不富耳後果如其言則天朝拜相而家常貧是時帝數幸宰相宅見嶠卧青色帳帝歎曰國相如是殊乖大體賜御用繡羅帳焉嶠寢其中達曉不安覺體生疾遂自奏曰臣少被相人云不當華故寢不安焉帝歎息久之又陝州刺史王當有女集州縣文武官令天綱揀婿天綱曰此無貴婿唯識果毅姚某者有貴子可嫁之中必得力當從其言嫁之時人咸笑焉乃元崇也時年二十三喜獵都未知書常詣一親飲有相

者謂之曰公後富貴言訖而去姚追而問之相者曰公甚貴為宰相歸以告其母母勸令讀書崇遂割放鷹鷄折節勤學仕竟至宰相則天之在襁褓也士彥令袁相妻楊氏天綱曰夫人當生貴子乃盡召其子觀之謂元慶元爽可至刺史終亦屯否見韓國夫人曰此女大貴不利其夫則天時在懷抱衣男子衣服乳母抱至天綱大驚曰龍睛鳳頭貴之極也若是女當為天下主矣已上俱出感定錄

能改齋漫錄云隋末袁天綱築室於閬州蟠龍山岐陽
李淳風聞其名齎金自遠師之他日同行郊野見牛迹
素語淳風曰此牛迹能知牝牡否淳風曰不知素曰乃
牝而有孕者又左目必傷當產一牡犢淳風尋問之皆
驗以為有術素曰非術也牛之有孕左重牡也右重牝
也吾視牛迹左足深必牡也惟食右邊草必左目傷也
淳風歎曰君術可及智不可及也

定命錄天綱有子容師傳其父業所言亦驗官為廩稀

令顯慶中與賈文通同供奉高宗以銀合盛一鼠令諸術數人射之皆言有一鼠容師亦曰鼠也然入一出四及開合鼠已生三子矣容師常與一書生同過江登舟訖遍視舟中人顏色謂同侶曰不可速也遂相引登岸私語曰吾視舟中數十人皆鼻下黑氣大厄豈可知而從之少留舟未發間忽見一丈夫神色高朗跛一足負杖驅驢登舟容師見此人乃曰可行矣貴人在內吾儕無憂也登舟至中流風濤忽起危懼雖甚終獲濟焉驅

驢丈夫乃婁師德也後位至納言

又云張柬之任青城縣丞年六十二矣有善相者云後當位極人臣衆莫之信後應制策被落值則天恠中第人少令於落人中更揀有司奏一人策好緣書寫不中程律故退則天覽之以為奇才召入問策中事特異之即收上第拜王屋縣尉後至宰相封漢陽王

朝野僉載周長安初前遂州長江丞夏文榮者能判寘事張鷟時御史出為處州司倉暫歸往問焉榮以杖畫

地作柳字曰君當為此州後半年除柳州乃改德州平昌令又蘇州喜興令楊庭玉則天之表侄也貪賄無厭著詞曰迴波爾時庭玉打僚取錢未足阿姑婆見作天子傍人不得張觸差攝御史康訐推奏斷死其母在都見文榮榮索一千張白紙一千張黃紙為祭祝曰後十日來母如言至榮曰且免死矣後六日內有進止果六日有敕楊廷玉改盡老母餘年又天官令史柳無忌造榮榮書衛漢柳字曰衛多不成漢柳二州交加不定後

果唱衛州錄事間重又唱漢州錄事時鸞臺鳳閣令史
唱柳州進狀訴天官注擬不平則天責侍郎崔玄暉
奏臣注官極平則天曰若爾吏部令史鸞臺令史交換
遂以無忌為柳州平陽主簿鸞臺令史為漢州錄事焉
松窗雜錄玄宗幸東都偶秋霽與僧一行共登天宮寺
閣臨眺久之上遐顧悽然發歎數四謂一行曰吾甲子
得終無患乎一行進曰陛下幸萬里聖祚無疆及西
幸至成都前望大橋上舉鞭問左右曰是橋何名節度

使崔圓躍馬前進曰萬里橋上因追歎曰一行之言果符吾無憂矣

酉陽雜俎云房琯太尉祈邢和璞箕終身之事邢言若來由東南止西北祿命卒矣降魄之處非館非寺非途非署病起於魚飧休於龜茲板後房自袁州除漢州及罷歸至閬州舍紫極宮適道士僱工治木房恠其木理成形問之道士稱數月前有賈客施數段龜茲板今治為屠廡也房始憶邢之言有頃刺史具鱠邀房房歎曰

邢君神人也乃具白於刺史且以龜板為託其夕病鱗而終

河東記云唐進士呂羣元和十一年下第遊蜀性麤偏不容物僕使者切齒恨之時過褒斜未半所使多逃去唯餘一廝養羣意悽悽行次山嶺歇鞍放馬策杖尋逕不覺數里杉松甚茂臨溪架木有一草堂境頗幽迥似道士所居但不見人步入後齋有新穿土坑長可容身其深數尺中植一長刀傍置二刀又於坑傍壁上大書

云兩口加一口即厭矣羣意謂術士厭勝之所亦不為異即去行一二里問樵人向之所見者誰氏樵人曰近地無此處因返窺之則不見矣後但遇衆會之所必先訪其事或解曰兩口君之姓也加一口品字也三刀州字亦象也君後位刺史二千石矣羣心然之行至劔南界計州郡所獲百千餘遂於成都買奴馬服用行李復泰成都人有曰南豎者凶猾無狀貨久不售羣則以二十緡易之既而鞭撻毀罵奴不堪命遂與其傭保潛起

戕殺之心伺便未發羣至漢州縣令為羣致酒晏時羣
新製一綠綾裘甚華潔縣令方然蠟淚數滴汚羣裘上
戲曰僕且拉君此裘羣曰拉則為盜矣復至眉州留十
餘日逗宿正見寺奴欲害之適遇寺僧有老病將終待
燭不絕其計不行羣此夜忽不樂乃於東壁題詩二篇
其一曰路行三蜀盡身及一陽生賴有殘燈火相依坐
到明其二曰社後辭巢燕霜前別蒂蓬願為蝴蝶夢飛
去覓關中題訖吟諷久之兩行淚下明日冬至抵彭山

縣縣令相訪羣形貌索然謂令曰其殆將死乎意緒不堪寥落之甚縣令曰聞君有刺史三品之說是得自寬也即為置酒極歡至三更羣大醉舁歸館中奴等已於羣寢牀下穿一坑大深數尺羣至則舁置坑中斷其首又以羣所攜劍當心釘之覆以土訖各乘服所有衣裝鞍馬而去後月餘奴黨至成都化鬻衣物畧盡有一奴分得綠表徑將北歸却至漢州街中鬻之遇縣令偶出見之識其蠟淚所污擒而問焉即皆承伏時丞相李夷

簡鎮西蜀盡捕得其賊乃發羣死處於褒中所見如影
響焉

杜悰在西川日厚待門下術士李生時馬植罷黔南赴
闕取路至成都李見之謂悰曰受相公恩久思有以効
荅今得矣黔中馬中丞非常人也相公當厚遇之悰未
信一日又密言於悰曰相公將有甚禍非馬中丞不能
救乞厚結之悰感其意乃發厚幣贈植仍令邸吏為植
於闕下買宅生生之費無闕焉植心感悰不知其旨尋

除光祿寺卿報狀至蜀惛謂李生曰貴人作光祿勳矣
曰姑待之稍進大理卿又遷刑部侍郎充鹽鉄使惛始
驚憂俄而作相懿安皇后宣宗幽崩惛懿安子婿也忽
一日內嬖子索檢責宰臣元載故事植喻旨翌日御延
英為萬端營救且素辯博能回上意事遂寢出感定錄
西川節帥段文昌字景初父鶚為枝江宰後任江陵文
昌幼少好屬文長自渚宮困於塵土乃遊成都謁韋南
康韋與奏釋褐道不甚行遂去南康之府值金吾將軍

裴邠鎮梁州辟為從事轉假廷評裴公府罷因抵興元城西四十里有驛曰鵠鳴後濱漢江前倚巴山有清僧依其隈不知何許人也常嘿其詞忽復言未嘗不中公聞之徑詣求宿願知前去之事自夕達旦曾無言忽問蜀中聞極盛旌旆而至者誰公曰豈非高崇文乎曰非也更言之公曰代崇文者武黃門也清公曰十九郎不日即為此入更盛公尋徵之便曰害風阿師不知因大笑而止由是頗亦自負戶部員外韋處厚出為開州刺

史段公是時任都官員外判鹽鐵案送出都門語處厚
過鵠鳴先訪清公因問還期曰一年半歲一年半歲又
問終止何官對曰宰相須江邊得又問段十九郎何如
荅已說近也及歸朝正三歲重言一年半歲之驗長慶
初段果自相位節制西川惟處厚不喻江邊得宰相廣
求智者解焉或有旁徵義者謂必除浙西夏口而入拜
及文宗皇帝踐祚自江邸首命處厚為相至是方驗乃
與鄒平公發役修清公塔因刻石記其事

戎幕間談蜀川有費雞師者善知將來之事為人禳救多在邛州時有一僧言雙流縣保唐寺有張三師者因巡寺有空院將欲住持率家人掃洒之際座上得一小瓶子有蛇在瓶內覆而出之約長一尺文彩斑駁五色備具令人筮送於寺外當振掇之際隨觸隨大以至丈餘如屋椽焉二人擔之方舉置處距寺約三二里撼動之時猶增長不已衆益懼遂擊傷至於死明日有虹蜺亭午時下此寺中有至臨邛見鷄師說之鷄師曰殺龍

女也張三師與僧徒皆當死後卒如言其他應驗類此
竟不知是何術韋約長兄為杜元穎從事弟妹皆識費
師在京中已曾知有此事及到蜀詢訪其術凡病者來
告師即抱一雞而往及其門乃持咒其雞令入於內抵
病者之所雞入而死病者差雞出則病者不起矣時人
遂號為費雞師又石子置病者腹上作法結印其子斷
者其人亦不起也又能書符先焚為灰和湯水與人吞
之俄復吐出其符宛然按酉陽雜俎云唐蜀費雞師

目赤無黑睛本濮人成式長慶初見之已七十餘或為解疾必用一雞設祭於庭又取江石如雞卵令疾者握之乃踏步作氣噓叱雞旋轉而死石亦四破成式舊家人朱安初不信嘗謂曰爾有厄因丸符逼令吞之復去其左足鞋及襪展視符文在足心矣又謂奴滄海爾將病令袒而負戶以筆再三畫於外大言曰過過黑跡遂透其背焉

北夢瑣言東川顧彥朗以蔡叔向為副使感微時之恩

雖為戎卒而嘗加敬其弟彥暉嗣襲酷好潔淨嘗嫌奴
臭左右薰香而備給使幕僚皆中朝子弟亦涉輕薄韋
太尉昭度收復蜀城以彥暉為招討副使在軍中每旦
率幕客同謁常武而蜀先主預焉共輕忽之雖昭度亦
嫌其不恭後為蜀主所破手刃一家郎官溫術等斃焉
先是蔡叔向職居元寮乃顧氏之心膂與所辟朝士優
游樽俎自不相侔小顧既是尊崇兼其掣肘故先主舉
軍伐之左蜀士有朱洽者常謂人曰二顧雖位尊方鎮

生無第宅死無墳墓人莫喻之蓋二顧自泰德軍小將際會立功便除東川弟兄迭據大顧卒遺命焚骸歸葬豐州會多事未果至小顧狼狽之日送終闕焉朱洽之言於斯驗矣

荆南節判司空薰與京兆杜無隱即滑臺杜悰常侍之子洎蜀人梁震俱稱進士謁成中令欲希薦送有薛少尹者自蜀沿流至於渚宮三賢常訪之一日薛謂薰曰閣下與京兆求名必無所遂杜亦非壽相惟閣下為人

繫維官至朱紫梁秀才此舉必捷然登第後一命不霑也後皆如其言梁公第後却思歸蜀重到渚宮江路梗紛未及西泝值淮師寇江陵渤海王邀至府衙俾草檄書欲辟於府幕堅以不仕為志渤海敬諾之二紀依棲竟是麻衣也出北夢瑣言

偽蜀有趙溫主善素許術占人災祥無不神中蜀謂之趙聖人武將王暉事蜀先主累有軍功而性獷悍至後主時為貴臣擠抑久沉下位王深銜之一日於朝門逢

趙公趙驚愕屏人告曰今日見君面有殺氣似有陰謀
但君將來當為三任郡守一任節制自是晚達不宜害
人以取殃禍王大駭乃於懷中探一匕首擲於地泣而
言曰正欲刺殺數子便自引決不期逢君指示請從此
止拜謝而退王尋為郡遷秦州節度蜀亡老於咸陽宰
相范質親見王話其事出玉堂閒話

偽王蜀葉逢少明悟以詞筆求知常與光憲偕詣術士
馬處謙問命通塞馬曰四十已去方可圖之未及而苟

得即壽不永於時州府交辟以多故參差不成身事後
充湖南通好判官未除前夢見乘船赴任江上候吏旁
午迎入石窟覺後話於廣成先生杜光庭次忽報敕下
授檢校水部員外郎廣成曰昨宵善夢豈此謂乎自是
解維覆舟於捷為郡青衣灘而死光憲自蜀泐流一夕
夢葉云子於青衣亦不得免覺而異之洎發嘉州取陽
山路乘小舟以避青衣之險無何篙折為逆流吸入青
衣幸而獲濟豈鬼神尚能相戲哉

扶風馬謙病瞽厥父俾其學易以求衣食居於安陸鬻筮自給有一人謁筮謂馬曰子之筮未臻其妙我有祕法子能從我學乎馬生曰諾隨往境內陶仙觀受星筭之訣凡一十七行馬請爵里云胡姓名恬且誠曰子有官祿壽五十二幸勿道我行止於王侯之門馬生得訣言事甚驗趙匡明棄荆入蜀因隨至成都王先主嘗令杜光庭先生密問享壽幾何對曰主上受元陽之氣四斤八兩果七十二而崩四斤八兩即七十二兩也子官

中郎金紫五十而殞

偽王蜀時閬州人何奎不知何術而言事甚効既非卜
相人號何見鬼蜀之近貴咸神之鬻銀肆有患白癩者
傳於兩世矣何見之謂曰爾所苦我知之也我為嫁聘
少鑠釧釵篋之屬爾能為致即立愈矣欣然許之因教
之曰爾家必有他人舊功德或供養之具在焉亡者之
魂所依故遣為此祟但去之必瘳也患者歸視功德堂
內本無他物忖思久之老母曰佛前紗窻乃重圍時他

人之物得非此乎遽徹去仍修齋懺疾遂痊何生末年
自布衣除興元少尹金紫妻兼邑號子亦賜緋不之任
便歸閬州而卒蓋預知死期也

偽蜀道士李嵩唐宗姓也生於徐州而遊三蜀詞辯敏
捷粗有文章因棲陽平化為妖人扶持上有紫氣乃聚
衆舉事而敗妖輩星散而嵩獨罹其禍先是嵩作書召
玉局揚得輝赴齋有老道士崔無斁自言患聾有道而
託箕術往往預知吉凶德輝問此行如何崔令書地作

字乃書北千兩字崔以千挿北上成乖字曰去即乖楊
因不果赴而曷以齋日就擒道士多罹其禍出北夢瑣
言

嘉州夾江縣人孫雄號卯齋其言事亦何奎之流偽蜀
主歸命赴洛時內官宋愈昭等當從行舊與孫相善咸
問將來升沉孫俛首曰諸官此去無災禍但行及野狐
泉已來稅駕又曰孫雄非聖人耶此際新舊使頭皆不
見矣諸官咸疑之衆後量其行邁合在咸京左右後主

罹偽詔之禍莊宗遇鄴都之變所謂新舊使頭皆不見也

甘節精術數言無不中常恐人薦達每見人即作鄉音曰我但能蜀語耳順均賊亂雷太尉召使隨軍一日忽言曰太尉少避有賊至雷命備之良久有刺客從地道出

唐濮間有相者彭克明號彭釘觔以其言事必中也九隴村民唐氏子家殷富彭謂唐郎即世當不挂一縷唐

曰我家粗有田隴衣食且豐可能裸露而終哉它日江水漲唐望潭上有一兔在水中央乃脫衣泗水捉之為汎波漂沒而卒

老學庵筆記李順獻馘非真者有蜀人言順逃至荆渚一寺有僧熟視曰汝有異相為百日偏霸主何在此耶今年不死尚有數十年壽又云方順亂作有術士折順名曰只有一百八日有西川耳安能久也如期而敗史延壽嘉州人以善相遊京師貴人爭延之視貴賤如

一坐輒箕踞爾我人號曰史不拘又曰史爾我呂文靖公嘗邀之延壽至怒闔者不開門闔者曰此相公宅雖侍臣亦就客次延壽曰彼來者皆有求於相公我無求於相公自欲見我耳不開門我竟還矣闔者走白公開門迎之延壽挾術以遊無心於用舍故能自重如此出王闢之澠水燕談

蜀有術士精於譚天尤善戲譴或以五行試其術答云此人必食祿異時官至五馬咸強其筆於楮為証驗於

是索筆書云目今歛板鞠躬已見二千石在後衆譁然
哂之且謂是乃挽米舟水手何謬言如是曰請細思之
衆方悟為之一咲游宦紀聞

于世尊遂州人與一女皆預知吉凶數州敬奉捨財山
積鑿鑿岩壁列為佛像所費莫知紀極節度使許公存
以其妖妄召至府衙俾射覆不中殺之神色不變於其
所居得五色文麻百馱其他錢帛稱是

集記清獻公知成都秩滿玉局化道士李垂應送至彌

年鎮曰後六年再當來此相迎清獻強之至漢州不肯
前曰漢州守聶友仲欲占命其人天獄星動故不敢見
未幾聶果以公事下獄比清獻再守成都又六年矣李
復至彌年相迎

志林至和二年成都人有費孝先者始來眉山云近遊
青城山客老人村壤其一竹床孝先謝不敏且欲償其
直老人笑曰子視其下字云此床以某年月日造至某
年月日為費孝先所壤成壤自有數何以償為孝先知

其異乃留師事之老人授以易軌革卦影之術前此未知有此學者後五六年孝先以致富今死矣然四方治其學者所在而有皆自託於孝先真偽不可知也聊復記之使後人知卦影之所自耳按志云孝先安仁人以經術顯名宿董正圖學舍壞其竹床也

丹淵集道士袁惟正字行之閬中人也其所住觀與余永泰山居相距纔百里予昔在鄉里時已聞袁君能用六十四卦推五行配六神使七十二煞言人禍福已發

未兆之應一一若目見然竟未識袁君之面也後余典校中祕書幸與士夫遊近日往往有為予言道士自蜀來者善以爻象消息休咎嘗與某人占某事某事約時指日無不如其說郭景純管公明之流也予雖舊聞袁君之術甚精而未敢以是必為袁君以對之暇日納涼於城南道宇有道士出西廡下高顴廣顙狀貌恠偉肅予入坐堂上予因問所從來曰來自蜀問何以居此曰往年嘗以占驗得權貴人意遂喜以紫服奏我館我於

是問其術誰師而如此曰自在蜀時已得異人授祕記
後復走天下東西南北殆遍聞某所有某人善此術者
雖數千里必往咨焉質吾所學而遂無疑凡今所言若
牛刀虱鏃見則洞然矣問其姓曰袁氏乃予昔在鄉里
時所聞與近日士大夫為予言者袁君是矣遂與之往
還一日詣予言諸友皆以字相稱我獨無敢以字請予
曰惟正者君名歟夫正者道之所由立也凡在天地間
涉形迹該事為者莫不保之以全其用者也或失之則

傾側邪辟龐雜垂盞於不善無不至矣今君方以是術
有名于時為人信嚮如能正以行之守之以固不為利
欲撓其心若莊遵季主之所為君之道高矣宜以行之
為字袁君跽而言曰方外之人未聞此語幸而君子字
我又因而規我敢不佩服以終世書以贈之嘉祐五年
僧海淵蜀人也工針砭天禧中入吳楚遊京師寓相國
寺中書令張士遜疾國醫拱手淵一針而愈由是知名
既老歸蜀范景仁賦詩餞之曰舊鄉山水遶禪局日日

山光與水聲歸去定貪山水樂不教魂夢到神京治平
二年化去張唐英貽以偈曰言生本不生言滅本不滅
覺路自分明勿與迷者說劉季孫銘其塔曰資身以醫
有聞於時餘幣散之拯人於危此士君子所難嗟吁乎
師

志林蜀人單驤者舉進士不第顧以醫聞其術雖本於
難經素問而別出新意往往巧發竒中然未能十全也
仁宗皇帝不豫詔孫兆與驤入侍有間賞賚不貲已而

大漸二子皆坐誅賴皇太后仁聖察其非罪坐廢數年
今驤為朝官而兆已死矣

宋史皇甫坦夾江人善醫術高宗召見問何以治身坦
曰心無為則身安人主無為則天下治為太后治目疾
立愈帝厚賜之一無所受復問以長生久視之術坦曰
先禁諸欲勿令放逸丹經萬卷不如守一帝善之書清
靜二字以名其菴且繪其像禁中隆興初入朝孝宗稱
為先生而不名坦又善相嘗言荆南帥李道中女必母

儀天下後果為光宗后

蜀中廣記卷七十八